

wol an eußerlicher gestalt als innerlicher beschaffenheit also zugerichtet/ daß sie mit mancherley Kranckheiten/ besonders aber der Schweren Noth behafftet/ vnd von selbiger öffentlich auff den Gassen dar nieder geworffen/ vnd zu einem jämmerlichen Spectackel liegende vielfältig gesehen worden. Bey welchem passu dieses insonderheit wol zumercken/ vnd solchem gäntzlich zuremediren billich ferner fleissige fürsehung zugebrauchen/ (massen denn guttes theyles albereit geschehen ist) damit durch solche herumb lauffende/ auch wol des Nachts herinnen verbleibende Bettler die Gassen hien vnd wider nicht also sehr vervnreiniget/ vnd bey diesem hitzigen schwülten vnd truckenen Weter ein so vberaus böser vnd schädlicher Gestank (dessen wir ohne dis wegen des so kleinen/ vnd vor diesem meisten theyles aufgetruckneten Olaflusses mehr/ als gutt/ vnd zu der innwohnenden Gesundheit dientlich ist/ täglich empfinden müssen) erreget werde/ Sintemal hierauf nichts anders/ dann allerley gefährliche Kranckheiten vnsfehlbar zugewarten sind. Welches alhier zu erjnnern/ ich nicht vmbgehen sollen/ Uns hier nechst allerseits vnter den Schutz vnd Schirm des Allerhöchsten zum trewlichsten empfehlende.



APPEN-